



EKONOMIAREN GARAPEN, JASANGARRITASUN ETA
INGURUMEN SAILA
Ingurumen Sailburuordetza
Ingurumen Administrazioaren Zuzendaritza

DEPARTAMENTO DE DESARROLLO ECONÓMICO,
SOSTENIBILIDAD Y MEDIO AMBIENTE
Viceconsejería de Medio Ambiente
Dirección de Administración Ambiental

EBAZPENA, 2021EKO OTSAILAREN
17KOA, INGURUMEN ADMINISTRAZIOAREN ZUZENDARIARENA, ELORRIKO HIRI
ANTOLAMENDUKO PLAN OROKORRAREN ALDAKETA PUNTUALAREN (SUNS-01 SAN BIZENTE-
ZABALETA EREMUAN) INGURUMEN-AZTERKETA ESTRATEGIKOAREN IRISMENA ZEHAZTEN
DUENA.

AURREKARIAK

2020ko abenduaren 3an, Elorriko Udalak Hiri Antolamenduko Plan Orokorraren Aldaketa Puntualaren (SUNS-01 San Bizente-Zabaleta) ohiko ingurumen-ebaluazio estrategikoa hasteko eskatu zuen, Euskal Herriko Ingurugiroa Babesteko otsailaren 27ko 3/1998 Lege Orokorrean eta Ingurumen Ebaluazioari buruzko abenduaren 9ko 21/2013 Legean xedatutakoaren arabera.

Eskabidearekin batera hainbat dokumentu erantsi ziren, tartean, planaren zirriborroa, legeria sektorialean eskatzen den dokumentazioa eta hasierako dokumentu estrategikoa, honako hauetan ezarritako edukiarekin: abenduaren 9ko 21/2013 Legearen 16. eta 18. artikulua, eta urriaren 16ko 211/2012 Dekretuaren —planen eta programen ebaluazio estrategikoen prozedura arautzekoa— 8. artikulua.

2021eko urtarrilaren 8an, ukitutako administrazio publikoei eta pertsona interesdunei kontsultatzeko tramitea egin zuen Ingurumen Administrazioaren Zuzendaritzak, halaxe zehazten baita abenduaren 9ko 21/2013 Legearen 19. artikuluan eta planen eta programen ingurumen-ebaluazio estrategikoen prozedura arautzen duen urriaren 16ko 211/2012 Dekretuaren 9. artikuluan. Era berean, Elorriko Udalari izapidearen hasieraren berri eman zitzaion.

Halaber, espedientean jasota dagoen dokumentazioa eskuragarri jarri zen Ekonomiaren Garapen, Jasangarritasun eta Ingurumen Sailaren webgunean, horretan interesa zuen orok aukera izan zezan ingurumen-arloan egoki iritzitako oharrek egiteko.

Legez ezarritako epea bukatuta, zenbait erantzun jaso dira hainbat erakunderen aldetik, eta haien emaitza espedientean jasota dago.

Jasotako txostenak aztertuta, egiaztatu da ingurumen-organoak bazituela behar beste judizio-elementu ingurumen-azterketa estrategikoen irismen-dokumentua egiteko, bat etorrita abenduaren 9ko 21/2013 Legearen 19. artikuluekin eta urriaren 16ko 211/2012 Dekretuaren 10. artikuluekin.

ZUZENBIDEKO OINARRIAK

Ingurumen Ebaluazioari buruzko abenduaren 9ko 21/2013 Legearen 1. artikuluan xedatutakoaren arabera, lege horren xedea da planen ingurumen-ebaluazioa arautuko duten oinarriak ezartzea, plan horiek ingurumenen ondorio adierazgarriak izan ditzaketenean; horretarako, ingurumenaren babes maila handia bermatuko da, garapen jasangarria sustatzea helburu hartuta.

Halaber, Euskal Herriko ingurugiroa babesteko 1998ko otsailaren 27ko 3/1998 Lege Orokorraren 42. artikuluan arabera, ingurumen-inpaktuaren ebaluazioek behar bezala bermatuko dute, besteak beste, helburu hau betetzen dela: hautabide egokienak hautatu ahal izateko, plangintza-prozesuaren lehen faseetan egingo dela ingurumenaren gaineko eraginei buruzko analisia, betiere kontuan izanik jardueren ondoriozko eragin metatzaile eta sinergikoak.

Abenduaren 9ko 21/2013 Legearen 6.1.a) artikuluan ezarritakoaren arabera, ingurumen-ebaluazio estrategikoa arrunta egingo zaie planei eta programei, bai eta haien aldaketei ere, baldin eta Administrazio

Donostia kalea, 1 - 01010 Gasteiz



publiko batek onartzen baditu eta legezko edo arauzko xedapen batek aginduta egiten eta onartzen badira artikulu honetan zehaztutako baldintzaren bat betetzen dutenean.

Otsailaren 27ko 3/1998 Legearen 46.1 artikuluan xedatutakoaren arabera, ebaluazio bateratua egin behar da, ingurumen-ebaluazio estrategikoa gisa ulertuta, arauaren 1. eranskineko a) letran jasotako planei lotuta, eta plan horien artean dago HAPOaren aldaketa puntuala, S.U.N.S.-01 San Bizente-Zabaleta eremuan.

Abenduaren 9ko 21/2013 Legeak xedatzen duenez, plan baten ingurumen-ebaluazio arrunta hasteko, beharrezkoa da ingurumen-organoak ingurumen-azterketa estrategikoaren irismena zehaztea, ukitutako administrazio publikoei eta interesdunei kontsulta egin ostean. Arau horrek 18.1. artikuluan xedatzen ditu hasiera-eskabideari erantsi beharreko dokumentuak, eta, abenduaren 9ko 21/2013 Legeari aurka egiten ez zaionean, urriaren 16ko 211/2012 Dekretuaren 8. artikulua zabaltu eta osatzen du hasierako dokumentu horri erantsi beharrekoaren edukia.

Amaitzeko, ingurumen-azterketa estrategikoaren irismena zehazte aldera, aintzat hartu dira 2013ko abenduaren 9ko 21/2013 Legeak IV. eranskinean jasotako eskakizunak, ingurumen-azterketa estrategikoaren edukiari buruzkoak, bai eta 2012ko urriaren 16ko 211/2012 Dekretuak I. eta II. eranskinetan jasotakoak ere, erreferentziazko dokumentuaren edukiari eta ingurumen-jasangarritasunari buruzko txostenaren edukiari buruzkoak, hurrenez hurren.

Orain arte azaldutako guztiari jarraikiz, espedientean jasotako txostenak aztertuta eta aplikatu beharreko legeak eta arauak ikusita (hau da, otsailaren 27ko 3/1998 Lege Orokorra, Euskal Herriko ingurugiroa babesteari buruzkoa; abenduaren 9ko 21/2013 Legea, ingurumen-ebaluazioari buruzkoa; urriaren 16ko 211/2012 Dekretua, planen eta programen ingurumen-ebaluazio estrategikoa egiteko prozedura arautzen duena; irailaren 6ko 18/2020 Dekretua, Lehendakariarena, Euskal Autonomia Erkidegoaren Administrazio sailak sortu, ezabatu eta aldatzen dituen eta sail bakoitzaren egitekoak eta jardun-arloak finkatzen dituen; apirilaren 11ko 77/2017 Dekretua, Ingurumen, Lurralde Plangintza eta Etxebizitza Sailaren egitura organikoa eta funtzionala ezartzen duena; urriaren 1eko 39/2015 Legea, Administrazio Publikoen Administrazio Prozedura Erkidearena; urriaren 1eko 40/2015 Legea, Sektore Publikoko Araubide Juridikoari buruzkoa; eta aplikatzekoak diren gainontzeko arauak), honako hau

EBAZTEN DUT:

Lehenengoa. HAPOaren aldaketa puntualaren (SUNS-01 San Bizente-Zabaleta eremuan) ingurumen-ebaluazio estrategikoaren irismen-dokumentua egitea, ingurumen-ondorioetarako soilik, honako baldintza hauen arabera:

1.- Planaren xedea eta ebaluazio-prozesuaren irismena

Elorrioko Hiri Antolamenduko Plan Orokorra 2011ko apirilaren 14an onartu zen behin betiko (220 zenbakiko BAO, 2011/11/18koa).

Onarpen horren aurka, Elorrioko auzo-elkarteen koordinakundeak administrazioarekiko auzi-errekurtsoa jarri zuen. Auzi hori 58/2012 zenbakiarekin izapidetu zen, eta EAeko Justizia Auzitegi Nagusiko Administrazioarekiko Auzien Salaren 2013ko urriaren 21eko epaiaren bidez amaitu zen, eta Auzitegi Gorenak kasazio-errekurtsoan berretsi zuen, 2015eko irailaren 2an emandako epaiaren bidez. Epaiaren edukia, San Bizente-Zabaleta eremuari dagokionez, honako hau izan zen: ezarri beharreko lurzoruaen sailkapena hiri-lurzoru finkatugabea zela, eta ez urbanizagarri sektorizatugabea.

Epaiari eta haren erabaki nagusiari berriro helduz, Udalak HAPOaren aldaketa puntual bat egin zuen, eduki honekin:

- Eragindako eremua: San Bizente-Zabaleta, Elorrioko HAPOko SUNS-01.
- Lurzoruaren sailkapena: hiri-lurzoru finkatugabea.
- Kalifikazioa: lehentasunezko erabilera orokorra: zabalgunee berriko bizitegia; baimendu daitezkeenak: hirugarren sektoreko erabilera, zuzkidurakoa eta bizitegiarekin bateragarriak diren beste batzuk; debekatuak: industrialak eta bizitegiarekin bateraezinak diren erabilerak.

Beraz, HAPOaren aldaketa honen antolamendu-helburu orokorrak honako alderdi hauetara mugatzen dira:

- Ingurumen-arloko helburuak eta irizpideak.
 - Kutsatuta egon daitezkeen lurzoruak deskontaminatzeari ekitea.
 - Pulla errekatosta berreskuratzea, eremu hori zeharkatzen baitu.
 - Ahal den neurrian, egungo ingurumen-balioak etorkizuneko antolamenduan sartzea (heskaiak, zuhaitziak eta belardiak).
- Etxebizitza
 - Eremuko hiri-bilbea modu seguruan eta genero-ikuspegiarekin egituratzea, Alde Zaharra eta San Anton auzoa lotzeko.
 - Ahalik eta gehien saihestea lurzoruaren artifizializazioa, hiri-lurzoruaren berronartzea eta dentsifikazioa sustatuz, honako proposamen hauek praktikan jarritz:
 - ✓ Bizitegi-lurzoruaren unitate trinkoak sortzea, lurzoruaren erabilera optimizatzeko.
 - ✓ Etxebizitza babestua lehenestea, udalerriko gazteen aukera-berdintasuna eta atxikidura ziurtatzeko.
 - ✓ Eraikuntza- eta urbanizazio-irizpide jasagarriak sartzea.
- Mugikortasuna
 - Alde Zaharra eta San Anton auzoa lotzen dituzten oinezkoen konexio-ardatzak modu seguruan eta genero-ikuspegiarekin indartzea eta sortzea.
 - Erabilerak antolatzea eta arautzea, eta beharrianak horien eta dagozkien lehentasunen arabera planifikatzea.
 - Urkizuaran kalean antzemandako akatsak konpontzea, oinezkoen ibilbidea osatuz eta merezi duen hiri-izaera emanez, bide-karga eta egungo erabilerak alde batera utzi gabe.
 - Bidegorrien eta oinezkoen pasealekuen sare seguru bat sortzea eta antolatzea, funtzionalak izango direnak herritarren eguneroko mugikortasunerako eta jolas-erabileretarako.
- Ekipamenduak eta zuzkidura-sistema
 - Hiri-egitura orekatua lortzea, hiri-ehunen eta espazio libreen eta ekipamendu publikoen arteko proportzio egokiarekin.
 - Gaur egungo beharrak eta HAPOaren aldaketatik erator daitezkeen biztanleria-hazkunderaren ondorioz izango direnak aztertzea, behar horiekin bat datozen jarduketa-proposamenak aplikatuz, eta horretarako lurzoruak beharrik gabe artifizial bihurtzea saihestuz.
- Azpiegitura-sareak
 - Dauden zerbitzu-sareak hobetzea, batez ere gauzatu gabeko konexioetan, bai eta eremua garatzeko beharrezkoak diren jarduketetan ere.

- Kultura Ondarea
 - Udal ondare arkeologikoa sendotzea, ondare hori kontserbatzen, babesten eta balioztatzen lagunduz, indarrean dagoen Euskal Kultura Ondareari buruzko maiatzaren 9ko 6/2019 Legean xedatutakoari jarraikiz.

2.- Ingurumen-helburu estrategikoak, printzipioak eta jasangarritasun-irizpide aplikagarriak.

Ingurumen-azterketa estrategikoak berariaz justifikatu beharko du Planak nola ezartzen dituen araudietatik, estrategietatik eta oro har onartutako programetatik eratorritako ingurumen-helburuak; nagusiki, 2020rako IV. Ingurumen Esparru Programaren helburu estrategikoak eta jarduketa-lerroak hartuko dira plana egiteko funtsezko oinarri gisa. Horrez gain, arau hauetan bildutako irizpideak jaso beharko dira: Euskal Herriko ingurugiroa babesteari buruzko otsailaren 27ko 3/1998 Lege Orokorra; urriaren 16ko 211/2012 Dekretua; eta Euskal Autonomia Erkidegoko Natura Kontserbatzeko Legearen testu bategina onartzen duen apirilaren 15eko 1/2014 Legegintzako Dekretua.

Era berean, ingurumena babesteko, planari aplikagarri zaizkion lurralde-antolamenduko planetan eta plan sektorialetan finkatutako irizpide, helburu eta zehaztapenak hartuko dira kontuan.

Zehazki, garapen jasangarriko printzipio hauek zuzenduko dute planaren ingurumen-ebaluazioa:

- Pulla errekastaren lehengoratzeta sustatzea, ibai-sistema orokor bihurtuz, bertan ematen diren jolas-edo kontenplazio-erabileretara egokituz, eta erabilera publikoak indartuz haren inguruan.
- Lurzorua zentzuz eta intentsitatez erabiltzea eta lehendik ere artifizialduta dauden lurzoruen erabilera intentsiboa lehenestea, lurzoru naturala urbanizatzetik babestuz.
- Arrisku naturalak minimizatzea, bereziki uholde-arriskua.
- Hiri-segregazioa eta hiri-barreiadura saihestea, bai eta mugikortasun behartua ere; horretarako, irisgarritasunaren alde egingo da, lurzoruaren erabileren eta mugikortasunaren plangintza integratuaren bidez, eta hiri-egitura dentso eta trinkoak sustatuz.
- Hauek sustatzea: energia aurrezte, energia berriztagarrien eraginkortasuna eta erabilera, eta kogenerazioa.
- Aire garbia bermatzea, baita zarata handien eta argi-kutsaduraren mende bizi diren biztanleen kopurua murriztea ere.
- Klima-aldaketarekiko kalteberatasuna gutxitzen laguntzea, kaltea arintzeko neurriak eta egokitze neurriak integratuz.

Ingurumen-ebaluazio estrategikoak baloratu beharko du proposatutako jarduerak nola integratzen dituzten aipatu garapen jasangarriko printzipioetatik ondorioztatutako ingurumen-helburu estrategikoak eta jasangarritasun-irizpideak. Horretarako, helburuok betetzeko hartutako neurriak/irizpideak identifikatu beharko ditu.

3. Esparru geografikoa eta ingurumen-arlo garrantzitsuak

'S.U.N.S.-01 San Bizente-Zabaleta' eremuak 64.678,48 m²-ko azalera du (6,46 ha), Elorrioko udalerrian, hiri eta landa arteko trantsizioko hiri-inguruko ingurune batean.

Mugakide ditu, mendebaldean eta ipar-mendebaldean, Elorrioko hirigunea; ekialdean, kirol-ekipamenduak eta lurzoru urbanizaezineko partzelak; eta hegoaldean eta hego-mendebaldean,

industrialdeak eta landa-lurzorua. Urkizuaran kaleak hego-mendebaldetik mugatzen du eremua, eta San Bizente kaleak hego-ekialdeko muturretik zeharkatzen du eremua.

Gaur egun, belardiek, baratzeek, heskaiek eta zuhaitz-espezietako zuhaizti txikiek hartzen dute, batez ere, eremua. Baserriak, industria-eraikin zaharkituak eta aipatutako industria horiei lotutako ibilgailuentzako aparkalekuak ere badaude. Iparraldeko muturrean Maderas Eleixalde SA enpresa dago, zuraren enbalajearen sektorekoa.

Pulla errekek, Zumelegi ibaiaren adarrak, erdialdetik zeharkatzen du eremua, hego-iparralderantz. Urkizuaran azpitik sartzen da eremura, eta industria-garapenen azpian lurperatuta iristen da haraino. Industria-eraikinen eta aparkalekuen artean mehertuta zeharkatzen du eremua, gutxi gorabehera 270 metroan zehar, Elizalde kalea gurutzatu arte. Azkenik, eremuaren iparraldeko mugaren ondoan 50 metro inguru korritzen ditu, eta, amaitzeko, Zumelegi ibaian isurtzen du, eremutik 60 metrora ibaian behera.

Eremu aldatua eta partzialki urbanizatua denez, ez da identifikatzen Basa eta Itsas Fauna eta Landaredian Arriskuan dauden Espezieen Euskadiko Katalogoan jasotako flora mehatxatuko espezierik.

Interes ekologiko handiena duen landaredi-unitatea Pulla errekaen ondoan eta egungo lurzatiei mugatzen diren espezie autoktonoen hostozabalen heskai-masek osatuko lukete nagusiki.

Bestalde, San Bizente-Zabaleta eremuan eta inguruan intereseko faunaren dibertsitatea eta dentsitatea nabarmen mugatzen duten faktoreak daude. Bertako fauna landazabal atlantikoko espezie tipikoek osatzen dute, eta horiei hiriko eta hiri-aldiriko inguruneetan lehentasunezko banaketa duten espezieak gehitzen zaizkie.

Hala ere, aipatu behar da bai Zumelegi ibaia, bai haren ibaiadarrak (eremu hori zeharkatzen duen Pulla erreka barne), bisoi europarraren Interes Berezikoko Eremuetan (AIE) sartzen direla. Espezie hori galtzeko arriskuan dago, eta kontserbaziorako onartutako kudeaketa-plan bat du. Kudeaketa-planaren arabera, Ibaizabalen goi-ibarrak Interes Berezikoko Eremuak dira bisoi europarra kontserbatzeko. Era berean, eremua Schreiberi muskerraren (Lacerta schreiberi) Lehentasunezko Banaketa Eremuan sartuta dago. Musker hori eremuan egon daiteke, ibaien edo erreken ertzei lotuta dagoelako bereziki, eta ohikoa da sega-belardien ondoko harrizko hormetan.

Eremuan dagoen kultura-ondareari dagokionez, esan behar da, "Ondarea" Euskal Kultura Ondarearen informazio-sistemaren arabera, eremuak mendebaldetik mugatzen duela Elorrioko Hirigune Historikoa, monumentu-multzo kategoriarekin sailkatutako kultura-ondasun deklaratu.

Halaber, eremu horretan sartuta geratuko litzateke XVI. mendeko San Bizente basiliza (Erdi Aro Ondokoa), Kultura, Gazteria eta Kirol sailburuordearen 1997ko maiatzaren 21eko Ebazpenaren bidez balizko arkeologia-gune izendatua. Baselizak ez du ageriko egiturarik, eta haren babes-eremua "planoak zehazten duen eremura" mugatzen da, 1997ko maiatzaren 12ko Erabakiaren arabera.

Gainera, ondare-elementuetako batzuk ez daude "ondarea" aplikazioan sartuta, baina identifikatuta daude GeoEuskadiren informazio geografikoko sisteman. Zehazki, 'Kultura-ondareko beste elementu eraiki batzuk' gisa identifikatzen da Elizalde baserria (165. fitxa), eremuaren iparraldeko muturrean kokatua, zeinaren fatxada batzuk partzialki kontserbatzen baitira gaur egun, bai eta Lince enpresaren nabea ere, 'Tratamendu-planta eta pieza amaitu' gisa identifikatua (254-4 fitxa). 'Kultura Ondarearen

beste elementu arkeologiko batzuk' gisa identifikatzen dira Elizalde baserria, eremuaren iparraldean, eta San Anton baserria, eremuaren hegoaldean.

"Ondarea"-n identifikatu ez diren kultura-ondareko elementuek interes handiko kultura-balioa dute eskualdean eta/edo udalerrian, baina haien balioak ez dira nahikoak monumentu izendatzeko, eta, beraz, udal plangintzaren katalogoaren bidez babestu behar diren udal/toki intereseko ondasuntzat hartzen dira.

Elorrioko Udalak Kultura Intereseko Ondasunen Katalogo bat du, non jasotzen baitira Eusko Jaurlaritzaren Kultura Ondarearen Zentroaren zerrendan dauden elementuak, kategoria guztietan, baita Udalak bere interes historiko-kulturalagatik babestu beharrekotzat jotzen dituen beste batzuk ere. Katalogoak, era berean, babes-araubide xehatua jasotzen du.

4. Jarduketak egiteko eremu desegokiak

San Bizente-Zabaletaren eremuan, eremu hori zeharkatzen duen Pulla errekarerekin lotutako uholde-arriskuko eremuak identifikatzen dira, 10 urteko, 100 urteko eta, bereziki, 500 urteko errepikatze-denboretarako. Ondorioz, uholde-arriskua duten polizia-eremuetako jarduketak Kantauri Ekialdeko Mugape Hidrografikoaren Plan Hidrologikoan ezarritakora egokituko dira.

Era berean, lurzorua kutsa dezaketen jarduerak izan dituzten edo dituzten kokalekuak identifikatu dira, eta eremuaren azaleraren heren bat osatzen dute (20.600 m²). Lurzorua kutsatzea saihestu eta kutsatutakoa garbitzeko ekainaren 25eko 4/2015 Legean ezarritakoaren arabera, erabilera-aldaketarekin lurzoruaren kalitatearen adierazpena egiteko prozedura hasi beharko da. Prozedura horrek lurzoru horien kudeaketa egokia bermatuko du, afektazio-arriskua minimizatzeko aukera emanez, bai obra-fasean (hala badagokio, kutsatutako lurzorua kudeatzea), bai ustiapen-fasean (bizitegi-erabilerarako eta erabilera publikorako lurzoruaren kalitate-helburuak betetzea).

5. Aurretiazko kontsultetako erantzunen ingurumen-azterlan laburra.

Jarraian ingurumen-alderdi garrantzitsuenak zein diren laburbiltzen da —ukitutako administrazio publikoei eta pertsona interesdunei egindako kontsulten izapidean jasotako txostenetan agertzen dira alderdi horiek—:

Kultura-ondareari dagokionez, hainbat babes-maila proposatzen dira eremuan hautemandako kultura-inbentariorako. Horrela, bereizketa egiten da Euskal Kultura Ondarearen EAeko Zentroaren datu-basean babes bereziko proposamena duten ondasunen, datu-base horretan tokiko babes-proposamena duten ondasunen eta Elorrioko HAPOak babestutako ondasunen artean. Era berean, Balizko Arkeologia Gune izendatutako guneak eta Euskal Kultura Ondarearen EAeko Zentroaren Datu Basean balizko arkeologia-gune izendatzeko proposatu diren beste elementu batzuk aipatzen dira.

6. Ingurumen-azterketa estrategikoan kontuan hartu beharreko funtsezko alderdien definizioa eta irismena.

Ingurumen-txosten estrategikoak Ingurumen Ebaluazioari buruzko Legearen (abenduaren 9ko 21/2013) IV. eranskinean ezarritako edukia bildu beharko du, eta hori urriaren 16ko 211/2012 Dekretuaren (planen eta programen ingurumen-ebaluazio estrategikoaren prozedura arautzen duena) II. eranskinean jasotzen denarekin osatu beharko da.

Aurrekoarekin bat etorritik, garatuko diren apartatuek honako eskema metodologiko honi jarraitu beharko diote:

1. Proposatutako planaren deskribapena
 - 1.1. Plangintzaren esparrua eta helburuak
 - 1.2. Planaren irismena, edukia eta garapena
 - 1.3. Plangintza-aukerak
2. Ingurumenaren ezaugarriak zehaztea
 - 2.1. Ingurumen-egoeraren deskribapena
 - 2.2. Laburpena: ingurumen-alderdi garrantzitsuak
3. Ingurumen-ondorioak
4. Prebentzio-, zuzentze- eta konpentsazio-neurriak
5. Ingurumena zaintzeko programa
6. Ingurumen-laburpena
7. Laburpen ez-teknikoa

Ebaluatzekoa den dokumentuaren ezaugarriak direla eta, uste dugu ingurumen-azterketa estrategikoak (aurrerantzean, Azterlana) hainbat alderdi landu behar dituela ahalik eta zabalen eta xeheen; honako hauek, zehazki:

6.1. Planaren deskribapena

Deskribatuko da zer alderdik konfiguratzen duten plana, eta argi eta garbi identifikatuko da plana gauzatzeak etorkizunean eragin ditzakeen ekintzetatik zeinek izan ditzaketen ondorio kaltegarriak ingurumenean. Hori guztia, honako apartatu hauetan adierazitako egitura eta xehetasunekin:

6.1.1. Plangintzaren esparrua eta helburuak

a. Azterketan HAPOaren aldatetarekin lortu nahi diren helburu nagusien laburpen txiki bat jasoko da. Gainera, azterlanak labur-labur jaso beharko du nola hartu diren kontuan, plana egitean, txosten honetako 2. apartatuan ingurumena babesteko jaso diren helburuak eta jasangarritasun-printzipio eta -irizpideak.

b. Hierarkian Plana baino goragoko mailan dauden planak edo programak identifikatuko dira. Azaletik deskribatuko dira planaren xedearekin edo esparruarekin zerikusia duten plan edo programa horien zehaztapenak eta aurreikuspenak, baita ingurumena babesteko planari aplikatzen zaizkion irizpide, helburu eta zehaztapenak ere.

c. Hala badagokio, adierazi beharko da zer irizpide eta zehaztapen ezarri diren hierarkiaz planaren gainetik dauden planen ingurumen-adierazpen estrategikoan, baita plana garatzeko beste tresna batzuetan

ezarritakoak ere, baldin eta ebaluatu beharreko planaren eremuari edo xedeari aplikatzekoak badira. Ingurumen-adierazpen estrategikoen erreferentzia aurkeztuko da, eta zehaztu egingo da zer aldizkari ofizialetan argitaratu diren, eta kontsulta-gunerako esteka txertatuko da.

d. Arauetan eta Planarekin hierarkia-loturarik ez duten bestelako planetan edo programetan ezarritako ingurumen-babeseko irizpideak, helburuak eta zehaztapenak xehatuko dira, aplikatu behar badira.

Zehazki eta beste batzuen artean, honako plan hauek hartuko dira kontuan:

- Durangaldeko Eremu Funtzionaleko Lurralde Plan Partziala.
- Kantauriko Ekialdeko Demarkazio Hidrografikoko Espainiako zatiko Plan Hidrologikoa (2015-2021).
- EAEko Ibaiak eta Errekak Antolatzeko Lurralde Plan Sektoriala.
- Foru Aldundiaren ekainaren 19ko 118/2006 Foru Dekretua. Horren bidez, Bisoi Europarraren (*Mustela lutreola* (Linnaeus, 1761) Kudeaketa Plana onetsi zen Bizkaiko Lurralde Historikoan, galtzeko arriskuan dagoen espeziea baita eta babesteko neurri bereziak behar baititu.
- Lurzoria kutsatzea saihestu eta kutsatutakoa garbitzeko ekainaren 25eko 4/2015 Legearen 23. eta 31.4. artikulua.
- EAEko hots-kutsadurari buruzko urriaren 16ko 213/2012 Dekretuaren 36. artikulua eta hurrengoak.

6.1.2. Planaren irismena, edukia eta garapena

a. Planean hautatutako aukeraren bidez indarreko antolamenduaren barruan aldatuko diren alderdi zehatzak eta zehaztapenak deskribatuko dira. Planaren irismena behar bezala definituta utzi behar da, plana egin aurreko aurreikuspenak (Planaren ingurumen-ebaluazioa egitean indarrean zeudenak) eta aurreikuspen berriak alderatuz.

b Aurreikuspen bat egingo da planean egiten diren proposamenak gauzatzeko burutuko diren proiektu eta jarduketan izaerari buruz, batik bat lurzoru kutsatuei eta urbanizazio-proiektuari buruz.

c. Deskribatuko da planeko zer ekintzak izan dezaketen eragina ingurumenean, eta ekintza horiek kokatuko dira; garrantzi handienetik txikienera hierarkizatutako dira, kontuan hartuta haien kokapen zehatza, izaera, magnitudea eta baliabide naturalen kontsumoa. Horrela deskribatutako plan-ekintza bakoitzari kode bat esleituko zaio. Kode hori azterlanaren hurrengo apartatuetan erabiliko da, baldin eta aipatu behar bada.

d. Plana onartu ondoren, haren garapena zehaztu eta plangintzaren geroagoko faseak aipatuko dira, baita planaren zehaztapenak ezartzeko tresnak ere. Era berean, aurreikusiko da garapen-tresna eta/edo proiektu horiek ingurumen-ebaluazioaren mende egon daitezkeela.

e. Nolanahi ere, Plana garatzeko zenbat denbora aurreikusten den erantsiko da, eta, hala badagokio, aurreko apartatuan azaldutako ekintzetarako denbora-aurreikuspena zehaztuko da.

f. Epigrafe honetan biltzen den informazioa kartografikoki islatuko da dagokion eskalan, eta lurraldearen erabilera islatuko du, baita ingurumen-ondorio nabarmenak ekar ditzaketen Planaren aurreikuspen eta jarduketak ere. Informazio kartografikoa atxiki beharko da, gutxienez hauek jasoko dituen: eremuaren mugaketa eta jarduketaren kokapena, pdf eta shape formatuetan.

6.1.3. Plangintza-aukerak

a. Azaletik deskribatuko dira plana emateko prozesuan kontuan hartu diren aukera guztiak. Aukera horiek bideragarriak izan behar dute teknikoki eta ingurumenaren aldetik, eta hauei buruzkoak izan daitezke: kokalekua, garapen teknikoa, aldi baterako garapena, kudeaketa, antolamendua, baliabide naturalen erabilera edo beste edozein alderdi.

b. Aukera horien irismena deskribatuko da, eta zehaztuko da zer alde dagoen aukera bakoitzaren arabera Planean jasotako proiektuen eta ekintzen artean, 6.1.2.b apartatuan deskribatutako proiektuekin eta 6.1.2.c apartatuan deskribatutako ekintzekin alderatuta.

c. Laburpen bat ere jasoko da azaltzeko zergatik baztertu diren aztertutako plangintza-alternatibak eta zergatik onartu den azkenean proposatutako alternatiba.

d. Aztertutako alternatibak kartografikoki jasoko dira.

6.2. Ingurumenaren ezaugarriak zehaztea

Azterlanak deskribatu beharko ditu zein diren ingurumenak egun duen egoeraren ezaugarri nagusiak Planak eragiten duen eremuan. Deskribapen horretan, elementu abiotikoen eta biotikoen ezaugarriak aztertuko dira, bai elementu bakoitzaren ikuspuntu sektorialetik, bai beren interakzioen ikuspuntutik, eta ingurumenaren egungo egoeraren ikuspegi integratua emango da.

Planaren eraginpeko esparrua, antolamendu-esparru osoa izateaz gain, esparru horren inguruerik hurbilena ere izango da, eta ingurune hori mugatuko da planaren ekintzek ingurumen-ondorio garrantzitsuak izan ditzaketen eremuetara.

Ingurumenaren kalitatearen gaineko alderdiei buruzko informazioa azterlanetan edo bestelako erreferentzia-dokumentuetan oinarrituta dagoenean, emandako datuen iturria identifikatuko da, eta adieraziko da zein den titulua, urtea, egilea, eta, hala badagokio, zer esteka balia daitekeen lana bere osotasunean kontsultatzeko.

Azterlanak eskalako planoak jasoko ditu, ingurunearen aldagaiak islatzeko modukoak.

6.2.1. Ingurumen-egoeraren deskribapena

Honako hauek izango dira, gutxienez, aintzat hartuko diren ingurumen-alderdiak:

a. Ingurune fisikoa. Zerbait faktore hartuko dira kontuan, hala nola arroka ama eta zorupea, haien iragazkortasuna, masak eta ur-puntuak, faktore klimatikoak eta lurzoru-mota. Lurzoru-motari dagokionez, dituzten ezaugarriak direla-eta gaitasun agrológico handiko modura katalogatutako eta babestutako lurzoruen erreferentzia aipatu beharko da.

b. Natura-ondarea. Natura- eta ekologia-intereseko elementuak jakinaraziko dira, baleude; esaterako, ibai-ibilguak, fauna- eta flora-espezie mehatxatuen banaketa-eremuak, Batasunaren intereseko lehentasunezko habitatak eta landaredia, flora eta fauna autoktonoak. Egungo elementuen kontserbazio-egoerari buruzko datuak emango dira, baita interes maila, kalteberatasuna, egungo presio eta mehatxuak ere, plana gauzatzean areagotu daitezkeenak.

c. Paisaia. Pertzepzioaren ikuspegitik elementu interesgarriak ote dagoen aztertuko da.

d. Ingurumen-arriskuak eta -arazoak. Uholdeak izateko arriskuari, lurzoruko kutsaduratik eratorritako arriskuari, lurpeko uren kalteberatasunari, arrisku geoteknikoei, klima-aldaketak eragindako arriskuei edo aipatu beharreko beste edozein ingurumen-arriskuri buruz bildu ahal izan diren datu guztiak aurkeztuko dira.

e. Orobat, airearen, uraren edo lurzoruaren kalitateari dagokionez hautemandako ingurumen-arazoak deskribatuko dira, egoera akustikoa barne. Iturri kutsatzaile izan daitezkeenak identifikatuko dira.

f. Apartatu honetan, gainera, egon daitezkeen beste ingurumen-baldintzatzaile batzuk landuko dira, baldin eta planaren ingurumen-ebaluaziorako garrantzitsuak badira, hala nola mugikortasunari eta garraioari buruzko alderdiak, eremuko irisgarritasun-baldintzak, baliabide berriztagarrien eta ez-berriztagarrien kontsumoari lotutako beharrak (ura, energia etab.), jendea bizi den eremuen presentzia eta kaltetua izan daitezkeen biztanleria eta abar.

6.2.2. Laburpena: ingurumen-alderdi garrantzitsuak

Aurreko apartatuan azaldutako deskribapen eta datuak oinarri hartuta, ingurumenaren egungo egoera aztertuko da Planaren eraginpeko esparruan, eta labor-labor jasoko da zein diren planeko jarduketan ondoriozko elementu, prozesu, arazo eta ingurumen-arrisku garrantzitsuenak ingurumen-ebaluazioko prozesuan. Arreta jarri beharko zaie ingurumenaren ikuspegitik interesgarriak diren esparru, elementu edo egoerei, baita eragina jasan dezaketen alderdiei ere; horretarako, kontuan hartuko dira planean jasota dauden jarduketan ondoriozko proiektuen eta ekintzen kokapena eta ezaugarriak.

Ingurumen-azterlan estrategikoak hauteman beharko du zer eremu izan daitezkeen arazotsu ingurumenaren aldetik, bateragarriak izan daitezen proposamenen garapenarekin; horretarako, kontuan hartu beharko du txosten honen 3. apartatuan adierazi diren eta ingurumenaren aldetik garrantzitsuak diren eremu edo elementuak daudela.

Era berean, eremuaren ingurumen-diagnostiko zehatza egin beharko da, eremuaren harrera-gaitasuna, arrisku guneak eta ingurune hauskor edo kalteberak ebaluatu ahal izateko.

6.3. Proposatutako planaren ingurumen-ondorioak

a. Apartatu honetan, identifikatu eta baloratu beharko da zer ondorio izan ditzaketen planean bilduriko ekintzek ingurumen-kalitateko elementuen gainean, eta ondorio horien ezaugarriak deskribatuko dira. Planaren ondorioak identifikatu eta horien ezaugarriak deskribatzeko, aztertuko da zer-nolako interakzioa dagoen lanean aurreikusitako ekintzen eta eragin ditzaketen ingurumen-elementuen ezaugarri espezifikoaren artean, bai eta zer ingurumen-arazo eta -arrisku sortu edo areagotu daitezkeen.

Ezaugarrien deskribapenean, argi eta garbi zehaztu beharko da zer motatako ondorioak dauden, honako hauek berezita: zeharkako ondorioak, metatze-ondorioak, ondorio sinergikoak, epe labur, ertain eta luzerako ondorioak, ondorio iraunkorrak eta aldi baterako ondorioak.

6.1.2.c apartatuan identifikatutako ekintza guzti-guztien ingurumen-ondorioak deskribatuko dira, eta espresuki aipatuko da apartatu horretan ekintzei esleitutako kodea.

Hala dagokionean, zehaztuko da zer efektu dakarren zenbait ekintzaren konbinazioak. Gainera, ingurumen-izaerako edozein ondorio bereziko da, baldin eta biztanleriaren, giza osasunaren edo ondasun materialen gainean ondorio kaltegarri eta nabarmenak izan baditzake.

Deskribatutako planaren efektu bakoitzari, berriz, kode bat esleituko zaio. Kode hori azterketaren hurrengo apartatuetan erabiliko da, horren erreferentzia behar bada.

Beste alderdi batzuen artean, honako eragin hauek aztertuko dira:

- Aztertu beharko da zer eragin izan dezakeen uholde-arriskuak hirigintza-garapenean, eta behar bezala justifikatu beharko da indarrean dagoen plan hidrológicoaren araudia betetzen dela, uholde-arriskuko zaintza-eremuen erabilera-mugei dagokienez (40. eta 41. artikulua). Justifikazio hori arloan eskumena duen organo baten azterlan hidraulikoan edo txostenetan oinarritzen bada, horiek ere gainerako dokumentazioarekin batera aurkeztu beharko dira, Ingurumen Adierazpen Estrategikoa eskatu ahal izateko.
- Kutsatuta egon daitezkeen kokaguneetan egindako indusketen eta lur-mugimenduen ondoriozkoak.
- Ingurumen-azterketa estrategikoan aztertuko da aurreikusi diren erabileretan zer mailatan betetzen diren 213/2012 Dekretuan ezarritako kalitate akustikoaren helburuak (213/2013 Dekretua, urriaren 16koa, Euskal Autonomia Erkidegoko kutsadura akustikoari buruzkoa), aurreikusitako erabileren arabera. Ildo horretan, xehetasunez deskribatuko dira kalitate akustikoko helburuak betetzeko behar diren neurri zuzentzaileak.
- Ingurumen-azterlan estrategikoak aztertuko ditu hirigintza-garapenak Pulla errekan, *Mustela lutreola* espeziean eta *Schreiber muskerra* espeziean izango dituen ondorioak.

b. Identifikatu eta kodetutako ondorio bakoitza baloratzeko, honako alderdi hauek hartuko dira kontuan, besteak beste:

- Gertatzeko probabilitatea, iraupena, maiztasuna eta itzulgarritasuna.
- Ondorioen larritasuna eta irismen espaziala.
- Eraginpean gera daitezkeen eremuaren balioa eta kalteberatasuna, honako hauek kontuan hartuta:
 - Natura-, kultura- eta paisaia-ezaugarri berezirik dagoen.
 - Aurkako ingurumen-baldintzarik dagoen, airearen, uraren edo lurzorua kalitate-estandarrak edo muga-balioak gaindi dezakeenik.

- Planak zer neurritan sortu edo areagotu ditzakeen ingurumen-arriskuak.

Ahal den guztietan, ondorioak zenbatetsiko dira, datu neurgarriak erabilia planean aurreikusitako jarduketak eta proiektuak gauzatzearen ondorioz deskribatu diren ingurumen-faktoreen egoera-aldaketei buruz. Hala badagokio, adieraziko da zer ziurgabetasun-maila dagoen ondorio edo efektu horien aurreikuspenean.

c. Era berean, ahal denean, ondorioak kartografia bidez lokalizatuko dira, eta, halaber, ahalegina egingo da zehazteko plan edo programaren zer fasetan gerta litezkeen ondorio horiek, aurreikuspenen arabera.

d. Adieraziko da ea hautemandako ondorio horren sorburu-ekintzak eskatzen duen ala ez planaren zehaztapenak beste plan eta programa batzuetan txertatzea, eta kasu bakoitzean zehaztuko da zein plangintza-tresnari eragingo zaion.

e. Hierarkizatu egingo dira hala deskribatutako ingurumen-ondorioak, eta haien garrantzi erlatiboa nabarmenduko da.

6.4. Prebentzio-, zuzenketa-eta konpentsazio-neurriak

a. Apartatu horretan, deskribatuko da zer neurri aurreikusten den azterlanaren 6.3. apartatuan deskribatutako ingurumen-ondorio kaltegarriak prebenitzeko, murrizteko eta, hala badagokio, konpentsatzeko. Hartuko diren neurriek bermatu egin beharko dute ez dela ingurumen-ondorio esanguratsurik sortuko, planaren ekintzak garatzearen eta etorkizunean gauzatzearen ondorioz. Haien helburua izango da natura-baliabideak, natura- eta kultura-ondarea babestea, natura-arriskuak prebenitzea eta atzemandako ingurumen-arazoen aurrean hobetu eta egokitzea.

b. Proposatutako neurriek koherenteak izan beharko dute aurreikusitako ingurumen-ondorioekin. Neurriak deskribatu egingo dira, eta 3. apartatuan identifikatutako ondorio edo efektuekin –prebenitu, zuzendu edo konpentsatu nahi direnekin– lotuko dira. Bereziki, eta beste batzuen artean, honako neurri hauek zehaztuko dira:

- Uholde-arriskua prebenitzeko neurriak. Horiek zehazteko, txosten honen aurreko apartatuetan aipatutako planetan ezarri irizpideak hartuko dira kontuan: EAEko Ibaietako eta Erreketako Ertzak Antolatze Lurralde Plan Sektoriala (E.2 apartatua) eta Kantauri Ekialdeko Plan Hidrologikoa (2015-2021), bereziki atal arauemaileko 44. artikulutik 46. artikulura zehazten diren irizpideak. Neurri horiek, besteak beste, honakoak izango dira: urbanizazio berriari drainatze iraunkorreko sistemak jarri, hala nola gainazal eta akabera iragazkorak; hartara, jariatze-ura lehendik dagoen egoerari dagokion balioarekiko handituz gero, konpentsatzeko modua egoteko, edo handitze hori hutsala izateko, Plan Hidrologikoaren 44. artikulua xedatuta duen bezala.
- Bermatu beharko da errespetatzen dela EAEko Ibaiek eta Errekak Antolatze Lurralde Plan Sektorialean eta Kantauri Ekialdeko Demarkazio Hidrografikoaren Uholde Arriskua Kudeatzeko Planean (2015-2021) ezarritakoa. Hartara, saihestu beharko dira, bai ibaien ertzen alterazioa eta artifizializazioa, bai ibai-korridorearen aniztasun eta funtzionaltasun ekologiko eta paisajistikoa laguntzen duten elementuena, eta sustatuko da, ahal denean, horiek lehengoratzeko, biziberritzea eta hobetzea.
- Lurzorua kutsa dezaketen jarduerak jasan dituzten kokalekuak daudenez, eta, beraz, etorkizuneko erabiltzaileentzat eta/edo ingurumenarentzat arriskuak izan daitezkeenez, lurzorua kalitateari buruzko adierazpena izapidetzeko beharrezkoa dena egin beharko da

Plana behin betiko onartu aurretik, Lurzoria kutsatzea saihestu eta kutsatutakoa garbitzeko ekainaren 25eko 4/2015 Legearekin bat etorritz.

- Pulla errekarari lotutako fauna-espezieentzat, bereziki *Mustela lutreolarentzat*, ondorio negatiborik ez dagoela bermatzeko neurriak.
- Pulla errekaen ibilguan egin daitezkeen jarduketan kasuan, hura berreskuratzeko neurriak, bioingeniaritzan oinarritutakoak. Honako neurri zuzentzaile eta konpentsatzaileak aplikatu beharko dira: erreka flora aloktonoa ezabatzea, eta, ibaiertzeko landaredi propiorik ez dagoen lekuetan, haltzadi kantauriarreko berezko espezieak aldatzea (bertako zuhaitz- eta zuhaixkak).
- Era berean, irizpideak zehaztuko dira planaren garapena paisaian integratzeko, erabili beharreko espezieak eta birlandatu beharreko gainazalak ezarrita, eta kontuan hartuta Eusko Jaurlaritzako Ingurumen, Lurralde Plangintza eta Etxebizitza Sailak egindako «Lorategi eta berdegune jasangarriak diseinatzeko eskuliburua» argitalpenean jasotako gomendio eta neurriak. Ildo horretatik, landareztatze- eta lorategi-lanetan ez dira inola ere erabiliko inbaditzaileak izan daitezkeen espezie aloktonoak, hala nola *Fallopia japonica*, *Robinia pseudoacacia*, *Cortaderia selloana* edo beste batzuk. Orobat, neurriak hartuko dira espezie horiek kentzeko eta lur-mugimenduen bidez hedatzea ekiditeko; horretarako, kontrolatu egingo da birlandaketan eta urbanizazioko lorategietan erabiliko diren mailegu-materialen eta landare-lurraren jatorria eta osaera.
- Ingurumen-ebaluazioari buruzko abenduaren 9ko 21/2013 Legeak eskatzen duenez, ingurumen-azterketa estrategikoak zenbait neurri jasoko ditu, planak klima-aldaketan izan dezakeen eragina arintzeko eta hartara egokitzeko. Xede horrekin, IHOBek egindako gida metodologiko hauek erabili ahal izango dira erreferentzia gisa: «Klima-aldaketara egokitzeko udal-programak egiteko gida. Udalsarea 21 lan-koaderno» eta «Euskadiko Hirigintzaren Plangintzari buruzko eskuliburua klima-aldaketa arintzeko eta klima-aldaketara egokitzeko».

c. Adieraziko da planaren zein zatitan txertatu diren proposatutako neurriak, eta espresuki zehaztuko da planean bildutako zein dokumentu teknikotan jaso diren neurri horiek.

d. Hala badagokio, prebentzio, zuzenketa eta konpentsaziorako neurriak proposatuko dira, horiek aplikatzea komenigarri edo egingarria denean, bai plangintzaren geroagoko fase edo etapetan, bai Plana gauzatzeko etorkizuneko proiektuetan.

e. Kostu ekonomikoren bat dakarten prebentzio eta zuzenketarako neurrien aurrekontua ere jasoko da, eta horrez gain, horiek gainbegiratzeaz arduratuko den agentea edo pertsona adieraziko da.

6.5. Ingurumena zaintzeko programa

a. Azterlanak ingurumena zaintzeko programa bat garatuko du, non deskribatuko baita zer neurri aurreikusten den Plana aplikatzeak dakartzan ondorioak gainbegiratzeko. Neurri horien helburua alderdi hauek kontrolatzea izan beharko da:

- Planak ingurumenean izan ditzakeen ondorio kaltegarriak prebenitu, murriztu edo zuzentzeko neurriak behar bezala ezartzen direla gainbegiratzea.

- Ingurumen-elementu garrantzitsuen eboluzioa zaintzea, bai eta plana martxan jarri aurretik zeuden ingurumen-arazoen eboluzioa ere.
- Plana gauzatzek eragindako ingurumen-ondorioak egiaztatzea, aurreikusi gabeko eragin kaltegarriak azkar identifikatzeko eta horiek saihesteko edo zuzentzeko neurri egokiak hartu ahal izateko.
- Aztertzea ea prebentzio- eta zuzenketa-neurri osagarriak hartu behar den plana egikaritzeko aurreikusitako garapen-tresnetan eta proiektuetan.

b. Jarraipen-neurriak identifikatu egingo dira, eta neurri horiek azterlanaren 6.4. apartatuan jasotako babes, zuzenketa eta konpentsaziorako neurriekin bat etorri beharko dute.

c. Ingurumena zaintzeko programak jaso beharko du zer adierazle proposatzen diren azterlanean, baita datuak biltzeko zer proposamen zehatz egiten den kasu bakoitzean ere, aldizkakotasunari eta erabiliko diren metodoei dagokienez.

6.6. Ingurumen-laburpena

a. Ingurumen-alderdiak planean nola txertatuko diren deskribatuko da. Xehetasunez aztertuko da nola hartu diren kontuan eta nola betearazi diren ingurumena babesteko ezarritako irizpideak, helburuak eta zehaztapenak, azterlanaren 6.1.1 apartatuan deskribatu denari jarraikiz.

b. Aztertuko da zer-nolako probabilitatea dagoen planak etorkizunean ingurumenean eragin adierazgarriak izateko, eta behar diren argudioak emango dira honako hau egiaztatze aldera: proposatutako babes, zuzenketa eta/edo konpentsaziorako neurriak planean txertatuz gero, oso arrisku txikia dagoela ondorio esanguratsu horiek gertatzeko eta, ondorioz, ez dagoela eragozpenik plana garatzeko. Ondorio hori gauzatu ahal izateko, azterlanaren gainerako apartatuetan jasotako informazioei buruzko erreferentzia egokiak erabiliko dira.

6.7. Laburpen ez-teknikoa

Azterketak aurreko epigrafeen arabera emandako informazioaren laburpen ez tekniko bat izango du; publikoak oro har ulertzeko moduko informazio zehatza izango du, aztertutako alderdi guztiak landuko ditu eta, era berean, informazio grafikoa izango du, dokumentu buruaskia eta azterketarekiko independentea izan dadin.

7. Jendaurreko informazioko izapideak eta kontsultak.

Urriaren 16ko 211/2012 Dekretuaren 12. artikuluan eta abenduaren 9ko 21/2013 Legearen 21. artikuluan ezarritakoaren ondorioetarako, organo sustatzaileak jendaurrean jarriko du Planaren hasierako bertsioa, baita ingurumen-azterketa estrategikoa ere, gutxienez 45 eguneko epean.

Era berean, kontuan hartuta urriaren 16ko 211/2012 Dekretuaren 12. artikulua eta abenduaren 9ko 21/2013 Legearen 22. artikulua zer xedatzen duten ukitutako administrazio publikoei eta interesdunei egin beharreko kontsultei buruz, erakunde eta pertsona interesdunen zerrenda hau hartuko da kontuan:

Eusko Jaurlaritza:

- Kultura Ondarearen Zuzendaritza
- Osasun Publikoaren eta Adikzioen Zuzendaritza.
- URA. Uraren Euskal Agentzia.
- IHOBE. Ingurumen Jarduketarako Sozietate Publikoa. Eusko Jaurlaritza.

Bizkaiko Aldundia:

- Kultura Zuzendaritza Nagusia.
- Ingurumeneko Zuzendaritza Nagusia

Beste batzuk

- Kantauriko Konfederazio Hidrografikoa, Uraren Euskal Agentziaren bitartez (URA).

Herritar interesdunak:

- Ekologistak Martxan Bizkaia Elkarte.
- Eguzki. Eguzkizaleak aisialdirako elkarte.

8. Dokumentazioa aurkezteko jarraibideak.

Ingurumen-adierazpen estrategikoa eskatzeko eta dokumentazioa entregatzeko, bete beharko dira Ekonomiaren Garapen, Jasangarritasun eta Ingurumen Sailaren webgunean horri buruz dauden jarraibideak, esteka honetan jasotzen direnak:

<https://www.euskadi.eus/tramitacion-del-procedimiento-de-evaluacion-ambiental-estrategico/web01-a2inginp/es/>

Eskabidearekin batera aurkeztu beharreko dokumentazioa gidaliburuaren arabera egin eta aurkeztu beharko da. Gidaliburua ingurumen-organoaren webgunean dago eskuragarri, esteka honetan:

https://www.euskadi.eus/contenidos/informacion/tramitacion_eae/es_def/adjuntos/GUIA-presentacion-documentacion.pdf

Bigarrena. Ebazpen hau Elorrioko Udalari jakinaraztea.

Hirugarrena. Ebazpen hau Ekonomiaren Garapen, Jasangarritasun eta Ingurumen Sailaren webgunean argitaratzeko agintzea.

Vitoria-Gasteiz, 2021eko otsailaren 17a.